



Clau Scherrer ha buca mo organisau, mobein era dirigiù ed accumpignau ils chors al clavazin.

FOTO HANS HUONDER

«Ei ha bunamein alzau il tetg dalla halla»

Il tierz Festival da la chanzun rumantscha ei a fin. Il president dall’uniun organisonta, Clau Scherrer da Trun, tila ina bilanza ordvart positiva da quel. La FMR ha discurriu cun el.

HANS HUONDER/FMR

FMR: *Clau Scherrer, varga 2000 persunas han gudiù il tierz Festival da la chanzun rumantscha a Vella ni sil livestream da RTR. Tgei bilanza targis Vos dalla fin d’jamna?*

Clau Scherrer: Nus essan fetg satisfatgs e cuntents cugl interess dalla glieud. La fascinaziun digl auditori ha entschiet cun concerts d’aula qualitat dils affons e da rock e pop il venderdis sera. Fetg simpatica ei la sentupada da cant per famiglias stada la sonda avonmiezdi e la concorrenza da cumposiziuns ei sesplegada fetg bein. In accent ha *Ruedi Lutz* dau cun sia cumposiziun «Gis da maina murir» cun text da *Claudio Spescha*. Cun siu cuntegn tucca el il temps ed intimescha da cantar encunter las crisas. Igl eveniment dalla natira a Blatten ha intimaù el a quella canzun. Cul diember da 45 cumposiziuns essan nus medemamein fetg cuntents. En quels treis festivals ha ei pia dau 132 canzuns novas. Al concert da gala dalla sonda sera ei la halla stada plena pli che piena. Igl ei stau in’atmosfera che ha bunamein fatg alzar il tetg dalla halla a Vella.

Pil festival a Vella ha ei dau duas novaziuns: *Ina concorrenza per cumposiziuns*

«Il festival duei dar colur allas atgnadads dalla regiun e duei era esser in arranschament per quella.»

Clau Scherrer, president dall’uniun organisonta

per chors da dunnas ed in chor da festival. Duas novaziuns cumprovas?

En mintga cass. Cul chor da festival havein nus vuliù remplazzar ils chors che cantavan las canzuns da concorrenza. Aschia ein tuts tocs vegni presentai ella medema cumposiziun e probabel eis ei aschia era stau pli simpel pil publicum da cumparegliar ils tocs. Il chor da festival ei s’entupaus a tschun exercizis naven dil zercladur. Sapientivamein havein nus vuliù mo paucs exercizis, pertgei ei duei ir tgunsch d’exercitar e da cantar las canzuns novas.

2028 leis Vos organiser il proxim festival, quei ei decidìu. Savess ei dar midadas en vesta a lez?

Quei dependa dil liug. Nus organisassen bugen il quart festival el Grischun Central ni en Sutselva. Il festival duei dar colur allas atgnadads dalla regiun e duei era esser in arranschament per quella. Il festival ha denton era la finamira da dar impuls musicals ad ina regiun en ina fuorma ni l’autra. Per quei motiv eis ei il mument aunc memia grev da dir co il program savess veser ora. Ei dat loghens interessai d’arranschar il quart Festival da la chanzun rumantscha.

DANIS

Auto cupitgau – automobilista senza blessuras

La gievgia suentermiezdi encunter sera ein in auto cupitgaus dado Danis. L’automobilista ei restada senza blessuras.

Sco quei che la Polizia cantunala dil Grischun scriva en ina comunicaziun als mieds da massa era la dunna ella vegliadegna da 51 onns entuorn las 17.00 sin viadi cun siu auto el territori Plaun Salter a Danis. Sin ina via funsila teissa ei il vehichel selischnaus dalla vart dretga ord via e cupitgaus dalla plaunca giuadora. La fin finala ei il vehichel sefrenaus si per ina plonta. L’automobilista ei restada senza blessuras. Ella ha denton stuiù vegnir deliberada ord igl auto entras ils pumpiers d’Ilanz/Glion. Las 14 persunas en engaschament han stuiù segirar igl auto. Cun in auto-tschaghegna ei igl auto totalmein demoliù vegnius salvaus. La Polizia cantunala dil Grischun sclarescha ils motivs digl accident. (cdm/fmr)



Igl auto ei cupitgaus e la fin finala sefrenaus si per ina plonta. FOTO POLIZIA CANTUNALA DIL GRISCHUN

VAL S. PIEDER

Cava da crappa Jossagada duei vegnir engrondida

Vischinas e vischins da Val S. Pieder han concediù plirs credits il venderdis sera.

La radunonza communal da Val S. Pieder ha acceptau la revisiun parziala dalla planisaziun locala il venderdis sera. Ella pertucca la cava da crappa Jossagada. Il davos plaid el capetel ha la votaziun all’urna.

Sco quei che la vischnaunca scriva en ina comunicaziun als mieds da massa, han vischinas e vischins acceptau in credit da 280 000 francs pil corp da pumpiers. Cun quels daners duei igl equipament digl auto cistiarna vegnir meglieraus.

Per construir in indrez solar sil baghetg dalla staziun da val dallas pendicularas ei vegniu concediù in credit da 230 000 francs. La lescha da baghegiar communal prescrive in’obligaziun da plattas da crap sils tetgs. Sin fundament da quei project sil tetg dalla staziun da val duei vegnir possibilitau alla populaziun da separticipar a quel. Il medem mument duei la protecziun ed il manteniment dils tetgs cun plattas vegnir rinforzaus en favur dil bi maletg dil vitg. Parallelmein duei denton era vegnir purschiu maun alla midada d’energia. Per la sanaziun dil mirsanteri per liung dalla gassa ha la radunonza communal concediù in credit da 100 000 francs. (cdm/fmr)

reclama

WYSS & PARTNER

SELTEN

Wyss & Partner: Die auch international gesuchten Vermögensverwalter am Fusse des Pizol.

wysspartner.ch

Victuras e victurs dalla concorrenza dil Festival da la chanzun rumantscha a Vella

Categoria chor d’affons

1. Salva el cor, m: Toni Rosenberger, Kriens (LU), t: Arnold Spescha.
2. Anusha, m: Jan van der Roost, Kontich (B), t: Arnold Spescha.
3. Il giat/Adieu alpetta, m: Thomas Thurnher, Dornbirn (A), t: Artur Caflisch (2 poesias).

Premi dil publicum: Anusha

Categoria chor da dunnas

1. Il vent dalla sera, m: David Lang, Rheinklingen (TG), t: Arnold Spescha.
2. Nina nana, bala beina, m: Sylke Zimpel, Dresden (D), t: Gion Deplazes.
3. Lev/Haver bugen/Sgulei, m: Thomas Thurnher, Dornbirn (A), t: Arnold Spescha (3 poesias).

Premi dil publicum: Il vent dalla sera

Categoria chor viril

1. Feglia d’atun, m: Flavio Bundi, Glion/Cuira, t: Victor Durschei.
2. Tschitta melna, m: Cyrill Schürch, Turitg, t: Gion Battesta Spescha.
3. Anemonas, m: Grégoire May, Küsnacht/ZH, t: Jon Guidon.

Premi dil publicum: Feglia d’atun

Categoria chor mischedau

1. Saulta ti diala, m: Cyrill Schürch, Turitg, t: Gion Battesta Spescha.
2. negin premi.
3. Verd uaul, m: Thomas Tschuor, Zignau/Windisch, t: Giacun Hasper Muoth.
3. Al laghet alpin, m: Flavio Bundi, Glion/Cuira, t: Michel Maissen.

Premi dil publicum: Saulta ti diala